

岭
南
遗
书

嶺南遺書

經夢編年

嶺南遺書

釋 成鷺 跡刪撰

古之老者八十爲耄耄者至也言老之將至無以加也老
僧之老至矣歸期將至回首八十年閒半爲俗人半居僧
次俗固夢境僧亦夢緣良由多生習氣未除是致現世虛
名點累俗眼旁觀少見多怪名教之士咸曰我爲罪人末
法眾生輒相視爲仇敵閒有二三知己索我于形骸之外
愛其自愛才其不才無過許以高僧契爲詩友究竟知我
罪我各從影子索形親卿愛卿未免貴耳賤目當局者夢
幻非真旁觀者見聞亦假往往仰天長嘆宇宙之大得一
知己死亦足矣向卜鹿湖避地偶因足疾還山寄食叢席

堅閉山門休心待盡頗有自得之樂重陽後霜氣新寒雨窗無聊屈指平生僧俗後先朝露者去如陌路之塵飄若秋林之葉升沈輪轉不可復問矣予何人斯孤軍後競呼吸旦夕能自保其無常乎因從夢中說夢幻外求真畧述四大生緣五倫假合自童而壯由壯而衰前塵影事依稀記憶信筆編年貽後人耳未敢爲識者道也老僧俗名顥愷字曰趾麀系出廣東廣州府番禺縣韋涌鄉方氏子禮先師石洞離幻覺和尚得度法名光鷲字曰卽山後從平陽祖派易光爲成別字跡刪志在韜光刪去形跡因以爲氏焉號曰東樵東樵者羅浮之別名最初出家先住羅浮不忘本也先府君名國驊字楚卿號騎田舉明季乙酉科

鄉薦先母碧江蘇氏禮報資曠老和尚稟受三皈法名悟
乾禮仁壽純覺和尚受優婆夷五戒寒家先世仕宦書香
不絕至先曾祖諱瓊字達和官至湖廣襄陽府參軍遷光
化縣令卒於官先府君生於楚中故字楚卿騎田者楚粵
名山也因以爲號先祖懿生公諱□□以椽曹早世先君
少孤食貧與先從伯正菴公同居省城之東門內少讀書
有文章名先母二十于歸事孀姑孝謹先君硯耕餬口於
四方鉗無貯粟糟糠不飽絕無交謫之言明崇禎丁丑年
三月二十一日亥時不孝子降生夢老僧入室而婉先母
嘗爲予言汝從僧來當從僧去夙緣如此次年戊寅舍弟
臨生一母乳兩兒紡績養姑備奉甘旨殊不易也先母每

言至此流涕沾臆哀哀父母生我劬勞不知所以報也一歲至三歲襁褓無知不及記憶四歲時甫能行走便學長跪禮拜先母自少至老崇信三寶晨夕焚修頂禮觀音大士兒時見而效之母拜亦拜齋素從之未嘗雜以葷酒是時先君入學大有聲譽交遊國中名士朝夕歌舞座閒無聲伎愀然不樂也予時爲兒五歲坐先君膝每見妓女呼之爲鬼先君笑而訊之曰汝母教汝耶則諫曰父以鬼爲樂祖母之教乎舉座大笑一日梨園觴客呼侍座側以童心可移也場中有肖爲達官榮顯者問曰汝悅之乎俯首不答俄爲大將登壇者曰汝悅之乎笑而已後有緇衣賜紫者曰悅乎笑而已三者一無所取座客叩其所以對曰

將相高僧非不可悅以其戲而非真也真則悅之矣四座
大笑謂此兒識真異日當爲真人年僅七歲膂力過人舉
重負汲能倍壯夫之任羣兒弗若之也俎豆嬉戲奉爲牛
耳長時明祚式微盜賊蠡起里巷皆兵予率羣兒效之竹
馬楮旗斬木揭竿學布陣於堂下已而塵飯塗羹犒師振
旅羣兒麾退乃掃地布席爲老僧趺坐之狀先君笑而問
曰梨園真乎兒戲真乎對曰昨乃假中之假今爲假中之
真先君頷之謂先母云治天下亂天下教壞天下男女必
此子也是歲之夏痢疫流行予染疾殊劇日行數十餘次
飲食不能杯勺百藥無效世醫束手矣柴臥牀席閒輾轉
兩期月僅得不死痢下如故也先君計無復之昇以往禱

於城北漢壽亭侯卜玳得吉辭而退甫下階失足一跌廟
高數仞拾級而後登焉久病蹙仆復得重創計不可起矣
旣歸久痢痊瘳創傷漸次平復返餘生爲無生皆神之賜
也時年九歲矣歲在乙酉久病初起請於父母出就外傳
受詩書家學先君戲之曰汝憶兒時弄兵堂下乎奚事詩
書對曰不事詩書而弄兵羣盜耳先君笑而可之爲之延
師師西樵李夫子諱彪字元之邑諸生教授有方先年從
兄蒙章名殿元甲午舉人甲辰進士受業其門不期月貫
通文義知有聖賢之學後通籍宰江寧郟縣二邑有政聲
皆師之教也夫子初年受經於先君門下延至家塾予與
仲弟臨字定磨舉鄉薦名曰廣比肩同受章句子頗有夙

慧耳聞心解過目成誦方明之季學者不尊朱註童蒙止授正文予於本文獨出已見正以師說甫一年四子本經識得大意下筆學爲童子科業頗能書寫胸臆文義卓然觀者或疑贗筆卽席命題而試頃刻立就律以制義八股體裁漠然不顧也時先君以詩文名世從之遊者往往吟咏達旦予請於師旁通風雅粗知聲律自是矢口能詩不自知有六朝三唐近體也一夕臘盡隆寒先君與客分賦花月風雪四詩沈吟未就予與仲弟嬉戲堂下擾亂詩思先君叱之使去予鼓掌笑曰吟詩樂事苦吟徒自苦耳客曰小子亦能詩乎卽應聲云瓶中一枝花窗外一輪月花落月歸天風吹滿地雪座客皆驚謂能四題合作詞約景

該長大當爲作者味其詞亦枯禪餘習爾是年先君讀書
於鄰坊之亦院子朝夕隨侍不離左右一日燕客俎中有
肉予侍客旁客勸令食是日齋期不及記憶怡然啖之先
君顧而笑曰兒破戒矣聞之大慙哭而歸跪大士前叩首
出血母問所以乃知誤受肉食之故勸令懺悔懺悔已哭
猶不輟出而哇之盡吐宿食啜淡粥三日然後飯食仍長
齋一月以補前愆兒時諦信如此家人卜吾異日必爲戒
律僧也又疾惡之嚴白少成性嘗侍先君側聞與客談論
甲申之變曰宰相誤國某相公奸某相公貪婪某相公庸
鄙秉鈞失人是致喪亂不可救也予聞而心憤之是歲賓
興先君舉於鄉粵俗稱謂子以父貴出入呼爲相公子艷

然作色謂其人曰相公惡名耳奸佞庸鄙誤國之賊予深恨之毋予瀆也混沌未鑿雖不辨名實嚴氣正性凜然莫犯如此行年十歲歲在丙戌明運將革廣州唐王粵西桂王各臣其臣土其土擁戴角立城池累卵如燕處堂弗卹也先君謂吾師曰天下大亂民不聊生兒輩讀書且休保全性命足矣予從旁應聲云除却詩書將以何者爲性命乎先君笑爲癡兒朝夕就傳學業不輟是歲十月之朔清撫軍佟名養甲督師李名成棟潛師東下直抵省城城門不閉兵不血刃入郭如破竹唐王肇武身殉社稷予隨父母避兵亦院竄榛莽間三日不火夜半還家得少食而返祖母二親未食已不敢先雖極饑困強作飽聲遇齋戒期

望空頂禮素食如常時年十有一歲在丁亥兵馬蹂躪家陷城中四月內有枉殺短衿之禍無辜受戮者數千人蓋李帥誤聽訛言謂城中百姓結盟爲亂各翦其衣內衿令短爲號不知廣民製衣多省布帛而縮其衿李帥信之執途人驗其衿短卽棄市先君亦短其衿在途聞變不知所踰垣避之幸免於難厥後李帥督師敗於信豐亂流以濟水及馬腹耳忽有鬼物出立水面牽掣其衿纏繫頸項遂溺而死左右皆見弗能救也論者咸謂短衿之報云從此閉門非有大故不敢出入予伏處牖下忍聲默誦日夕不輟年十有二歲在戊子大兵之後必有凶年至夏大饑斗米千錢人或相食予家十餘口日啖糠覈存亡不保至

是始廢學業齋戒禮拜未嘗廢也艱難萬狀不可具述先是佟李爭長文武不協李帥蠟書密通西粵迎立桂王移師下端州三月內反正朔復衣冠奉桂王爲主改元永厯以郡宇爲行宮時方危亂文臣縮手詞翰需人先君蒙薦詔授翰林庶常予從赴行在知其不可力勸返轍先君亦以爲然以母老辭退脩初服旣歸里佃田數畝於東郊外黃花塘畔率兒僕躬耕築草亭於田閒以避風雨顏曰祝豐予雖總角膂力過人負耜饁餉一日數往返猶能乘閒讀書先君加顧復焉舊集中有祝豐亭示兒詩蓋命之也詩失於兵僅憶笑看于耜者猶是採薪人之句餘忘之矣年十有三歲在己丑反覆粗定有司試士予出應童子科

見賞於番禺邑令汪公名起蛟號漢狎三覆面試名列第五以文體出格而抑之也應學道試文宗李公名綺字友三閱二藝亦以奇橫惜之列名案末充番邑博士弟子員時年僅舞象耳卓然章縫之列覆髣髴以儒冠釋斑衣而儒服歸於鄉里人爭榮之笑語之曰此兒戲耳予何樂此名教中大有樂地請索我於塵飯塗羹之外見真秀才真面目矣聞者皆謂狡童口給舍而去之年十有四歲在庚寅清平南王尙名可喜靖南王耿名重明帥師南下恢復廣東正月內城中聞警舉國惴惴巡撫杜名永和移家戰艦將帆海南竄矣越月大兵未入境復還據城未幾兵至駐札北郭外連營十里軍勢殊銳杜不克帆海乃堅壁固

守三面拒敵惟南門通海運接濟糧草不致合圍坐困耳
下令居民婦女不許出城男子往來印臂爲號先君以母
在不忍遽去遣予兄弟先還鄉里圍城八月餘日夕攻守
砲礮聲如洊雷民不聊生士不解甲城中有掌兵柄者范
某踰垣納欵致礮臺失守清兵據險薄城勢不可支眾將
解體先君知不可守泣別老母先六日冒險還鄉至十月
初二日城陷以拒命故屠焉男子之在城者靡有孑遺婦
稚悉爲俘擄監管取贖七日止殺先君入城幸眷屬無恙
揭榜國門責輸軍餉二千餘金先君還里罄賣田宅典鬻
衣物經營二月餘眷屬復得完聚旣歸家徒四壁生計蕭
然不得已設席黨塾受徒傳經藉脩脯以供菽水令予兄

弟改業學爲農圃佃田耕稼借地樹藝饑寒切身不復知有詩書矣昔持齋戒不覺漸負夙心初焉不擇葷素饑則餉之久之不顧名分急則就之童時嬉戲夙習尙存往往見獵心動日與鄉里惡少交遊舉重扛鼎運槊試劍橫行市井莫敢誰何幸而廉恥尙存殺盜姦妄未嘗破犯耳出遇不平奮臂而起鋤強扶弱不避權貴敬賢疾惡不擇親疎慨然以任俠自許郭解荆卿無多讓也倒行逆施不可盡述年十有五歲在辛卯嶺南底定文宗李名頴馳檄遠近歲例校士士子一名不到以叛逆罪罪之永謝場屋先君既有命矣至是公令嚴督自憑血氣之勇文以忠孝之名毅然不赴眾皆危之或相勸曰盍畏死乎曰人誰不死

貴得死所壯士死於沙場義士死於法場文士死於名場
等死耳既不能爲馬革裹屍復不屑爲猴冠改面捨生取
義不猶勝於文場求活耶未幾場後計不赴考數十百人
不可勝誅文宗雅量置之不問榜列姓名除諸生籍且令
學校諸生作西山採薇女以送之予獲幸免殊有矜色誇
示同黨自稱忠孝男子不自知其非也父母禁之不可宗
族鄉黨憂之不敢面斥其非年十有六歲在壬辰夏駕如
故忤逆不可枚舉年十有七歲在癸巳歲復大禋數年來
兇悍之性爲饑渴所迫漸次消磨平日交遊惡少半爲溝
壑殍至是始萌悔心一日侍立講席先君演說論語至德
之不修章援引晉人周處晚節勸勵改過處字子隱膂力